



**Sumáriu Kazu**  
**Tribunál Judisiál Primeira Instáncia Suai**  
**Marsu 2023**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instáncia Suai**  
**1. Totál kazu ne'ebé JSMP monitoriza :13**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	7
artigu 178 KP	Koasaun seksuál	1
Artigu 259 KP	Danu agravadu	1
Artigu 267 KP	Burla agravadu	1
Artigu 171 KP	Aktu seksuál ho adolexente	1
Artigu 145 KP	Ofensa ba integridade fízika simples	1
Artigu 145 KP, Artigu 258 KP no Artigu 20 (1), artigu 2 (2 alinea f) Lei Arma Brankas	Ofensa ba integridade fizika simples, danu simples no arma brankas	1
<b>Totál</b>		<b>13</b>

## 2. Totál desizaun ne'ebé JSMP monitoriza: 8

Tipu pena	Artigu	Númeru
Suspensaun ba prizaun nia ezekusaun	Artigu 68 KP	4
Pena multa	Artigu 67 KP	3
Totál		7

3. Totál kazu ne'ebé adia tuir JSMP ninia monitorizasaun: 0

4. Totál kazu sira ne'ebé sei kontinua prosesu tuir JSMP nia monitorizasaun: 5

### B. Deskrisaun sumáriu julgamentu ba desizaun kazu sira

#### 1. Krime ofensa ba integridade fízika simples ho natureza violénsia doméstika

Nú. Prosesu : 0036/22.CVSUI

Kompozisaun Tribunál : Singulár

Juis : Dr. Jose Maria de Araujo

Prokuradór : Dr. Pascasio de Rosa

Defeza : Dr. Domingos dos Santos

Desizaun : Pena multa US\$60.00

Iha 10 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AP hasoru nia feen, iha Munisípiu Covalima.

#### Akuzasaun Prokuradór

Prokuradór akuza katak iha 07 Agostu 2022, iha oras tuku 20:30 kalan, arguidu basa dala rua iha lezada nia hasan parte loos rezulta moras no bubu. Antes agresaun ne'e, arguidu ho lezada diskute malu kona-ba bainhira arguidu fila husi serbisu fatin, lezada la tein nune'e arguidu haruka lezada atu tein maibé lezada lakohi, nune'e mosu agresaun refere.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

#### Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak baku feen ne'e ladi'ak, arrepende ona nia hahalok no promete sei la repete tan hahalok hanesan hasoru lezada iha futuru no foin primeiravés mai hatan iha tribunál.

Depoisde rona deklarasaun arguidu nian, prokuradór husu ba tribunál atu presinde deklarasaun husi lezada tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezada nia deklarasaun.

#### Alegasaun finál

Prokuradór, haktuir katak arguidu komete krime hasoru lezada ne'ebé nu'udar nia feen, arguidu mós hatene katak baku feen ne'e ladi'ak maibé nia baku nia feen. Tanba ne'e

husu ba tribunál atu kondena arguidu ho pena multa.

Entretantu, defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru.

### **Desizaun**

Depoizde avalia faktu sira hotu, tribunál prova katak arguidu basa dala rua iha lezada nia hasan parte loos rezulta moras no bubu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu 0,50 sentavus kada loron, durante loron 120. Tribunál mós fiksa pena alternativa durante loron 60 prizaun, bainhira arguidu la selu pena multa refere.

## **2. Krime ofensa ba integridade fízika simples ho natureza violénsia doméstika**

Nú. prosesu : 0042/22.PDSUA  
Kompozisaun Tribunál : Singulár  
Juis : Dr. Naason Mário Armindo Marques Doutel  
Prokuradór : Dr. Rafael Jeronimo Gusmão  
Defeza : Dr. Angelmo Pinto  
Desizaun : Pena prizaun fulan 3 suspende ba tinan 1

Iha 13 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LF hasoru nia feen, iha Munisípiu Bobonaro.

### **Akuzasaun prokuradór**

Prokuradór akuza katak iha 06 Agostu 2021, iha oras tuku 13:00 meiodia, arguidu tuku dala ida iha lezada nia hirus matan, tuku dala ida iha lezada nia kotuk laran no tuku dala ida iha lezada nia ulun, rezulta lezada sofre moras no bubu. Antes agresaun ne'e, arguidu ho lezada diskute malu kona-ba arguidu deskonfia lezada amante (*selingku*) ho lezada nia eis katuas oan, nune'e mosu agreasaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha julgamentu, arguidu konfesa parsialmente ba faku iha akuzasaun, arguidu deklara katak momentu ne'e rona husi viziñu sira dehan lezada ho nia eis katuas oan haris hamutuk, nune'e arguidu basa dala ida iha lezada nia hasan parte karuk, enkuantu faktu sira seluk ne'e la loos hotu.

Iha parte seluk lezada kontinua konfirma faktu hotu iha akuzasaun no deklar katak moris separa ona ho arguidu.

### **Alegasaun finál**

Prokuradór haktuir katak, arguidu konfesa parsialmente ba faktu iha akuzasaun katak momentu ne'e basa dala ida de'it lezada nia hasan, maibé lezada kontinua konfirma faktu hotu iha akuzasaun, nune'e prokuradór konsidera arguidu provadu komete krime hasoru lezada, tanba ne'e husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza haktuir katak, arguidu deklar de'it faktu ne'ebé nia komete, nune'e husu ba tribunál atu kondena arguidu ho pena ne'ebé adekuadu.

### **Desizaun**

Depoisde avalia faktu sira hotu, tribunál prova katak arguidu tuku dala ida iha lezada nia hirus matan, tuku dala ida iha lezada nia kotuk laran no tuku dala ida iha lezada nia ulun.

Bazeia ba faktu sira provadu sira ne'e no tetu mós sirkunstánsia hotu ne'ebé haleu krime ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

### **3. Krime ofensa ba integridade física simples ho natureza violéncia doméstika**

Nú. prosesu : 0004/22.CVFTK  
Kompozisaun Tribunál : Singulár  
Juis : Dr. Naason Mário Armino Marques Doutel  
Prokuradór : Dr. Rafael Jeronimo Gusmão  
Defeza : Dr. Jonas Henrique da Costa  
Desizaun : Pena prizaun fulan 3 suspende ba tinan 1

Iha 13 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu AG hasoru nia feen JCG, iha Munisípiu Covalima.

### **Akuzasaun prokuradór**

Prokuradór akuza katak iha 14 Outubru 2022, iha oras tuku 16:20 lokraik, arguidu buti lezada nia liman kabun parte karuk rezulta moras no bubu. Antes agresaun ne'e, arguidu ho lezada diskute malu kona-ba lezada haruka arguidu atu ba kuru bee maibé arguidu lakohi, nune'e mosu agresaun ne'e. Kazu ne'e aneksa mós ho fotografia no relatóriu médiku husi Sentru Saúde Fatululik.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no deklara katak arrepende ona nia hahalok, foin primeiravés mai hatan iha tribunál, di'ak malu ona ho lezada no promete sei la komete tan krime hanesan iha futuru.

Alende ne'e, lezada mós kontinua konfirma faktu hotu iha akuzasaun no konfirma mós ho arguidu ninia deklarasaun katak depoisde akontesimentu ne'e sira di'ak malu ona no to'o agora arguidu la komete tan krime seluk hasoru lezada.

### **Alegasaun finál**

Prokuradór haktuir katak arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e atu prevene krime hanesan akontese tan iha futuru husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza haktuir katak, arguidu konfesa, arrepende ona nia hahalok no promete sei la repete tan krime hanesan iha futuru, nune'e husu ba tribunál atu kondena arguidu ho pena ne'ebé kmaan.

### **Desizaun**

Depoisde avalia faktu hotu, tribunal prova katak arguidu buti lezada nia liman kabun parte karuk rezulta moras no bubu.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok, di'ak malu ona ho lezada no promete sei la komete tan krime hanesan hasoru lezada iha futuru, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

## **4. Krime ofensa ba integridade fízika simples ho natureza violénsia domestika**

Nú.Prosesu	: 0023/22.CVMCT
Kompozisaun Tribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Rafael Jerónimo Gusmão
Defeza	: Dr. Anselmo Pinto
Desizaun	: Pena multa US\$60.00

Iha 16 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FdC hasoru nia eis feen, iha Munisípiu Covalima.

### **Akuzasaun Prokuradór**

Prokuradór akuza katak iha 08 Outubru 2022, iha oras tuku 14:30 meiodia, arguidu tebe dala ida iha lezada nia ain parte loos rezulta moras. Antes agreasaun ne'e, arguidu ho lezada diskute malu kona-ba lezada rona informasaun husi ema seluk katak arguidu konta lezada nia vida privada ba ema seluk, lezada rona ida ne'e ba husu tuir arguidu iha arguidu ninia uma, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan too tinan 3 ka multa konjuga ho artigu 2, 3 (a) no 35 (b) LKVD.

### **Produsaun ba prova sira**

Iha julgamentu arguidu hili direitu nonook, entretantu lezada kontinua konfirma faktu hotu iha akuzasaun. lezada deklara katak ho arguidu separa tiha ona mak foin arguidu halo agresauun hasoru lezada.

### **Alegasaun finál**

Prokuradór haktuir katak, mezmu iha julgamentu arguidu hili direitu nonook, maibé lezada kontinua konfirma faktu hotu iha akuzasaun, prokuradór konsidera arguidu provadu komete krime hasoru lezada, tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu kondena arguidu tuir konviksaun tribunál nian.

### **Desizaun**

Depoizde avalia faktu hotu, tribunál prova katak arguidu tebe dala ida iha lezada nia ain parte loos.

Bazeia ba faktu provadu hirak ne'e no tetu mós sirkunstánsia hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu US\$1.00 kada loron, durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere no selu mós kustu judisiál U\$10.00.

## **5. Krime ofensa ba integridade fízika simples ho natureza violénsia doméstika**

Nú. Prosesu : 0100/22.BBMLV  
Kompozisaun Tribunál : Singulár  
Juis : Dr. Naason Mário Armindo Marques Doutel  
Prokuradór : Dr. Rafael Jeronimo Gusmão  
Defeza : Dr. Angelmo Pinto  
Desizaun : Pena prizaun tinan 1 fulan 6 suspende ba tinan 3

Iha 17 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu UA hasoru nia feen, iha Munisípiu Bobonaro.

### **Akuzasaun prokuradór**

Prokuradór akuza katak iha 31 Agostu 2022, iha oras tuku 8:00 dadeer, arguidu tuku dala rua iha lezada nia kanuruk, tuku dala rua iha lezada nia kotuk laran no tebe dala ida iha lezada nia kanotak rezulta lezada monu ba rai. Antes agresauun ne'e, arguidu ho lezada diskute malu kona-ba arguidu haruka lezada daan marungi tahan, maibé lezada la daan no arguidu mak daan rasik no arguidu husik hela iha fugaun leten ba sosa dose, bainhira arguidu fila mai marungi daan ne'e been maran tiha ona, nune'e mosu agresauun refere.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál too tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha prosesu julgamentu, arguidu hili direitu nonook, entretantu lezada continua konfirma faktu hotu iha akuzasaun no deklarata katak depoisde akontesimentu liu semana ida di'ak malu fali ona ho lezada no to'o agora arguidu labaku ona lezada no lezada mós perdua ona arguidu.

### **Alegasaun finál**

Prokuradór haktuir katak, mezmu iha julgamentu arguidu hili direitu nonook, maibé lezada continua konfirma faktu hotu iha akuzasaun, nune'e atu prevene arguidu komete tan ninia hahalok ne'e iha futuru husu ba tribunál atu kondena arguidu ho pena prizaun tinan ida suspende ba tinan rua.

Entretantu defeza haktuir katak, depoisde akontesimentu sira di'ak malu ona, arguidu mós larepete ona ninia hahalok hasoru lezada no lezada mós perdua ona arguidu, tanba ne'e husu ba tribunál atu kondena arguidu ho pena ne'ebé kmaan.

### **Desizaun**

Depoisde avalia faktu hotu, tribunál prova katak arguidu tuku dala rua iha lezada nia kanuruk, tuku dala rua iha lezada nia kotuk laran no tebe dala ida iha lezada nia kanotak rezulta lezada monu ba rai.

Bazeia ba faktu provadu ne'e no tetu mós sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan tolu no selu kustu judisiál US\$10.00.

## **6. Krime ofensa ba integridade física simples ho natureza violénsia doméstika**

Nú.Prosesu : 0131/21.BBMLV  
KompozisaunTribunál : Singulár  
Juis : Dra. Patricia de Araújo F. B. M Xavier  
Prokuradór : Dr. Pascaçio de Rosa Alves  
Defeza : Dr. Anselmo Pinto  
Desizaun : Pena prizaun fulan 6 suspende ba tinan 1

Iha 17 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VAdR hasoru nia feen, iha Munisípiu Bobonaro.

### **Akuzasaun prokuradór**

Prokuradór akuza katak iha 23 Dezembru 2021, iha oras tuku16:00 lokraik, lezada hamutuk ho nia oan no subriñu halimar iha kama leten besik arguidu toba ba lezada nia subriñu tanis, arguidu ho hirus dehan katak "*nusa mak goza labarik to'o tanis*" lezada hatan katak "*ó toba ba ha'u halimar ho labarik*" nune'e arguidu hateten ba lezada "*hau*

*tebe ó tun husi kama leten ga,*” lezada hatan katak “*ó la mane tebe tok,*” nune’e arguidu hader husi kama leten basa dala ida iha lezada nia hasan parte loos, tuku dala ida iha lezada nia kotuk laran, tuku dala ida iha lezada nia matan parte karuk, tuku dala tolu iha lezada nia ulun no tuku dala ida iha lezada nia inus.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3 (a) no 35 (b) LKVD.

### **Produsaun ba prova sira**

Iha julgamentu, arguidu konfesa totalmente ba faktu hotu iha akuzasaun, arrepende ona ninia hahalok, di’ak malu ona ho lezada, foin primeiravés mai mai hatan iha tribunál no promete sei la repete tan krime hanesan hasoru lezada ka ema seluk iha futuru.

Depoisde rona deklarasaun arguidu nian, prokuradór husu ba tribunál atu presinde deklarasaun husi lezada tanba arguidu konfesa faktu integralmente. Kona-ba pedidu ne’e, defeza laiha opozisaun. Tribunál bazeia ba pedidu refere, presinde audisaun ba lezada nia deklarasaun.

### **Alegasaun finál**

Prokuradór konsidera arguidu provadu komete krime hasoru lezada, bazeia ba konfisaun arguidu nian, mezmu sira di’ak malu ona maibé atu prevene krime refere akontese tan iha futuru husu ba tribunál atu kondena arguidu tuir artigu 145 KP.

Entretantu defeza husu ba tribunál atu kondena arguidu ho pena ne’ebé justu ho konsiderasaun katak, arguidu konfesa, arrepende ona ninia hahalok, foin primeiravés mai hatan iha tribunál no promete sei la komete tan krime hanesan hasoru lezada ka ema seluk iha futuru.

### **Desizaun**

Depoisde avalia faktu sira hotu, tribunál prova katak basa dala ida iha lezada nia hasan parte loos, tuku dala ida iha lezada nia kotuk laran, tuku dala ida iha lezada nia matan parte karuk, tuku dala tolu iha lezada nia ulun no tuku dala ida iha lezada nia inus.

Bazeia ba faktu provadu sira ne’e no tetu mós sirkunstánsia atenuante sira hanesan arguidu konfesa, arrepende ona nia hahalok, di’ak malu ona ho lezada no foin primeiravés mai hatan iha tribunál. Ho nune’e tribunál konklui prosesu ne’e no kondena arguidu ho pena prizaun fulan neen suspende ba tinan ida.

## **7. Krime ofensa ba integridade fízika simples ho natureza violénsia doméstika**

Nú.Prosesu	: 0013/22.BBMLV
KompozisaunTribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Pascasio de Rosa Alves
Defeza	: Dr. Anselmo Pinto
Desizaun	: Pena multa US\$60.00



Iha 20 Marsu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AA hasoru nia feen, iha Munisípiu Covalima.

### **Akuzasaun prokuradór**

Prokuradór akuza katak iha 13 Feveiru 2022, iha oras tuku 12:30 meiodia, arguidu foti ai-sar baku dala tolu iha lezada nia kotuk laran, baku dala rua iha lezada nia kidan parte loos no tebe dala iha lezada nia ain, bainhira lezada halai tama ba kuartu laran arguidu tuir lezada no tuku tan dala ida iha lezada nia liman sikun rezulta moras no bubu. Antes agresaun ne'e, arguidu ho lezada diskute malu kona-ba arguidu nia feton telefone ba arguidu atu tun ba ajuda ninia feton maibé lezada simu telefone tolok arguidu nia feton no arguidu, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3 (a), 35 (b) no 36 LKVD.

### **Produsaun ba prova sira**

Iha julgamentu aguidu hili direitu nonook. Entretantu lezada kontinua konfirma faktu sira iha akuzasaun no deklara katak depoisde akontesimentu arguidu husu kedas diskulpa ba lezada no lezada mós perdua ona arguidu.

### **Alegasaun finál**

Prokuradór konsidera arguidu provadu komete krime hasoru lezada, mezmu iha julgamentu arguidu hili direitu nonook, maibé lezada konfirma faktu sira hotu iha akuzasaun, nune'e husu ba tribunál atu kondena arguidu ho pena ne'ebé justu.

Entretantu defeza husu ba tribunál atu kondena arguidu tuir konviksaun tribunál nian.

### **Desizaun**

Depoisde avalia faktu sira hotu, tribunál prova katak arguidu foti ai-sar baku dala tolu iha lezada nia kotuk laran, baku dala rua iha lezada nia kidan parte loos no tebe dala iha lezada nia ain, bainhira lezada halai tama ba kuartu laran arguidu tuir lezada no tuku tan dala ida iha lezada nia liman sikun rezulta moras no bubu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>